

萬歷仙居縣志卷之十一

忠義列傳

宋王珪字叔寶咸寧四年進士德祐丙子太后詔台州降元公時以太學博士權知州事與陳仁玉築城浚濠倡民堅壁以守城既陷公赴泮橋水死之元兵至欲取首級以獻功其侄賓服珪冠帶自戕以全珪屍

一云珪臨海人

趙時栗字寬甫咸淳四年進士授海鹽主簿與元兵對壘旬餘食盡力戰死高申甫字宣卿由武科除景陵縣元兵至格鬪而死張華宗者教授杭州及揚州臨江所至有聲開慶間元兵壓境欲火文廟華宗挺身翼之曰甯殺我毋使先聖無依也遂遇害

元吳揚字仲修以字行素以勇力聞至正間辟巖州同知時處睦溪洞寇侵仙居仲修率民捍禦于羅漢潭賊不敢進會有內應者凌晨襲其不備衆遂潰散仲修獨挺身格鬪手刃數人而死其子吳燾吳忻復率鄉兵擒賊并內應者剖心

萬歷仙居縣志

卷十一

一

仙居叢書

以祭其父有司以聞詔表其門曰忠孝立忠烈祠于縣南以祀仲修燾與忻加官有差

國朝盧迥少豪舉酒酣輒歌不屑曲謹洪武間貢入太學太祖微行觀燈窺聽書聲問曰今宵花市何不往觀迥曰雙親遠離功名未就思之悚然奚暇遊翫因與共談至午夜應對詳明旦日召授戶部主事歷官侍郎靖難兵至抗節不屈延頸就刑長歌自若聞者壯之

鄭恕字本忠工詩善書聚生徒談經爲時宗所慕洪武間貢爲鄞縣訓導陞蕭縣知縣靖難兵至城陷遂死之

顧碩洪武間以通經儒士授山西石樓知縣授吏部主事文皇入金陵卽帝位召之不赴棄官逃去爲富家牧牛每至山椒水湄輒飲泣微咏每出牧携一竹筍緘膝甚密暮歸卽枕之臥或問此中何所有珍之乃爾輒悶悶不答至永樂二十一年盡赦諸死義家公聞之輒然歌曰騎牛緩緩過前阿手執牛繩口歎

歌牛飽人饑欲歸去幸何幸何幸幸何乃鬪笥出衣冠服之別主人而歸詢其詳始知爲碩也

張約字存博邑諸生每以忠義自許嘉靖丙辰倭寇犯境約率家人禦於光明山之麓爲寇所執劫導入城厲聲罵曰恨不斫賊奴萬段肯爲汝鄉導耶賊割其舌猶以血噴之罵不絕口而死郡守譚公綸詣約死所爲文以弔之

論曰宋元諸君子臨難抗節九死靡移有不俟生而存者我朝建文諸臣蹈白刃甘赤誅若合符節其名與天壤俱流矣顧公晦名匿迹忍垢茹荼卒保其身以全其宗尚矣至嘉靖之季張公乃以青衿罵賊而死亦烈矣哉

孝友列傳

宋吳沆歷知昭靖二州母老乞祠以武經大夫主崇道觀割股和藥以愈母病縣令趙幼聞立純孝坊以旌之名其里曰孝義

鄭憲官大學博士德祐間元兵壓境憲奉母以逃遇兵欲殺其母憲抱持號泣

以身翼之曰甯殺我遂俱遇害時有顧玉文者元兵至台而父被執玉文捍之頸被數刃與父俱仆移時復甦支離得免退居事母孝養彌篤吳處仁父爲元兵所驅巡山呼其子索銀以代死處仁趨而語之曰銀吾所藏也容歸取以贖父及發窖則已爲人所得矣乃曰銀已失吾戴吾頭來以代父死其弟淵詣前抱持亦祈代兄衆愕然義之遂俱獲免詳見翁森三孝傳

國朝朱煦父季用洪武中知福州有詔盡革官吏之爲民害者季用與焉輸罪作城役嚴償重日費數十緡季用謂煦曰吾貲力何以堪此旦夕且死汝取吾骨歸葬耳煦惶懼不敢離左右時同役告枉者甚衆令益嚴告而被極刑者四人矣與同役謀曰吾無術以脫吾父訴不訴等死萬一吾父以訴獲免吾死何恨遂陳其情于上上乃赦季用而復其官緣煦訴而得復官者十四人皆拜季用謝曰微君有孝子吾儕爲城下塵矣已而煦以病死十四人者哀之如已子而季用感傷病益甚亦死編修王叔英作孝子傳以表之

張宏宗少失父事母孝養備至嘗再刲股和藥以進性輕財好施有老嫗坐負官錢幾死乃傾囊贖之又有少年遺十金而哭於市亦如數與之所司以孝廉聞於上徵之不赴

戴彥信父養原饒於財比鄰陳某坐籍歿而無貲詭言寄百金養原所遂并繫獄彥信痛父無辜訴于上願以身代父死詔釋養原而彥信竟死于獄朝野咨嗟稱爲孝子

應昌少孤事母至孝母死勺水不入口哀毀踰禮蔬食三年廬於墓側寢地久遂得痲疾時年已六十餘矣每遇親諱日輒涕泣不食如此者終其身焉

吳榮璧孝于父母百計圖維以供甘旨每父母食必與妻竊視之父母色喜方敢退而嘗食及居喪哀毀寢地徧身黧黑三年不入私室其兄強之以肉出而哇之其從子炳漢孝行純篤酷類榮璧既貢當謁選而不忍別親其親強之曰吾望汝祿養汝不行何由得祿不得已赴京選如臯訓導將迎養而其親死炳

漢聞訃搥胸痛哭嘔血數升不食七日而卒

張援父祿爲匠者所構提赴京師援從行父于舟中患痢援焚香告天願以身代日夕扶抱至手掬其臭穢既抵京例以朝廷興作民間占庇工匠者罰工彌重援入事其父出任其勞未嘗少懈事竣南還溺於吳江而死聞者悲之

楊治卿天性純孝父病閉結以指挑出之父死哀痛迫切臥棺下者三年母死亦然出入必告於親之靈以詩授生徒至蓼莪章未嘗不三復流涕也嘉靖間縣令姚公本崇給匾以旌其孝

論曰洪武初新樂劉氏剔股奉姑詔旌其門已江伯兒割脇殺子上聞震怒遂著爲令嚴禁之蓋毀不滅性禮也然較路人其親者何如哉昔人有言禮者聖人所以化性而起僞其然豈其然歟然吾觀田野之家一饘一粥直呼其親而致之融融然樂也而鳴鐘鼎食志養缺如蓋其禮明者其意衰故有然矣

貞節列傳

宋吳氏女年十八有殊色呂師囊亂竄匿山谷賊遇之脅以爲偶拒不從纏其髮於柱而支解之

彭氏張華宗之子公德妻也華宗事具忠義傳公德蚤世無子彭氏矢志貞守四十餘年會詔錄忠臣後節婦事上聞封孺人表其閭曰忠節世家

元吳氏女至元間兵亂父攜之避于山菴寇執而欲私之曰從則生不從則死女拒不從於是先刃其父以劫之女大慟曰父緣我死尚從汝耶抗顏受刃以死國朝鄭氏二女父恕見忠義傳有旨夷其族千戶某以兵至豔其姿欲納之二女佯許乘間赴井死

沈氏孝子戴彥信妻也彥信代父死或謂沈曰可以嫁矣曰吾頭可斫志不可轉也奉姑教子終其身云

裘氏徐仲成妻也年二十餘寡有遺腹紡績撫孤始終無玷

王氏舉人暨仁壽妻也年二十仁壽死貧而無子矢志節終身不二

顧氏女名惜寶年十五嘉靖間倭掠懷仁女與父妾阿香被執賊艷之迫以刃女佯順之給賊行至坐口湖層崖百尺下矚深淵女語香曰吾得死所矣曰爾能死吾豈獨生遂俱投于湖而死

陳氏應宗儒妻也宗儒死二子曇昌尙襁褓有利其財者多方撓之值歲饑陳指倉困歎曰此禍本也悉散之家由是貧而矢操彌勵有司以聞詔表其閭陸氏張惟本妻惟本死時陸年二十斷髮誓守嫠居六十餘年邑令親詣其門獎之侍郎盧公迥詩曰冰操泣鬼神丹衷昭日月事姑兼訓子凜凜真超越其見重如此

應氏林世珍妻年二十寡且無子攻苦茹荼矢志堅守詔旌其閭

吳氏年十九適生員尹德袞甫二年袞死遺孤方一歲父母欲奪其志曰是利吾奩耳悉以嫁時衣飾還之以死自誓舅姑繼亡室如懸磬苦節彌堅

潘氏年十七適吳炳用年二十二炳用死一男甫三歲未幾亦死舅姑欲嫁之曰吾知有節安知無兒臥夫棺側者廿年聞者嗟異侍姑疾手掬臭穢無強色倭寇薄城其兄弟邀與俱逃曰有舅姑在吾忍去乎於是兄弟舁其舅姑偕行潘徒步從之人皆曰甯獨潘氏賢也其兄弟並有國士風矣

金氏者炳用之族弟生員炳徵妻也炳徵死金年二十有三撫遺孤事舅姑盡孝無媿於潘炳用侄時永亦早析妻金氏年十九寢不離棺行不踰閭遺腹數月艱辛撫育底於成立三氏萃於一族俱稱貞孝而潘無子尤爲苦節

兩王氏者一蔣伸妻一蔣弼妻與蔣熠妻張氏俱二十而寡冰蘖自守以完節終

尹氏廩生張桴妻也桴病尹氏籲天請以身代夕夢神人以烈女傳授之覺而夫死時尹年方二十一植節終其身督學萬公潮獎之曰金石之守之死靡他冰玉之操垂老無玷

博士應賓妻鄭氏生員王懋統妻朱氏吳元龍妻蔣氏俱二十四歲而寡矢志植孤並稱完節

王氏張澄妻也年二十三嘉靖倭入城翁老見執澄挺身全父遇害王氏痛夫死孝矢志冰節代養植孤紡績不輟年登七十知縣湯聘尹立匾揚之

王氏生員吳錫年妻年二十五錫年卒慟絕復甦召族人爲夫置祠事畢從容自盡知縣顧震宇匾其門曰貞烈

論曰詩頌君子偕老本支百世婦人備此稱榮幸焉乃身膺榆翟之寵而泯沒不自見者比比是矣彼夫剔面薙髮殞巖溺淵以成其志而茹酸一時流爍千古夫豈不幸與仙雖小邑而矢志抱節暉映後先蓋山川之所鍾亦其培植之者有素也倘埋光沉彩阨於上聞而旌揚之所不及乎則守土者有深懼焉

遺逸列傳

宋呂逢時字原道少受經本邑陳令襄入太學與鄭獬友駙馬都尉錢景臻師之欲奏以官辭後隱于白巖山羅提刑適舉以孝廉亦不就

林放字達本元祐中將上禮部以親死廬墓側後築艸堂于東山隱焉大觀中詔求八行縣欲以放應放不憚去之二十里其高臥東山詩云三間老屋青山幽清風洒洒寒飈颼脫巾坦腹臥其下此身直與淵明儔老松飛翠落夏簟六月不暑涼如秋人生百年一夢幻世間萬事空悠悠一聲老鶴忽驚惺山爐活火茶烟浮

蔣晉仕不得志歸隱於柘澣葛山之下吳康肅稱其仕不殞身去不忘君忠智迥出尋常云

張會龍以武翼郎通判雷州宋亡遂幽棲巖穴不肯仕元有蔣仲班者以文行為鄉人所重亦深自沉冥屢徵不起

呂徽之號六松博學工詩宋亡不仕居萬山中以漁樵自給一日大雪攜楮幣

易粟于富家聞其分韻賦詩有得藤滕二字者苦吟不就不覺失笑主人恠而延之援筆立成曰天上九龍施法水人間二鼠嚙枯藤鶩聲亂功收蔡峽蝶飛來妙過滕衆皆驚服復以曇字請則云竹委長身寒郭索松埋短髮老瞿曇問其姓名不答與之粟曰吾豈受不義之財者必易之卽刺船而去從而尾之路甚迂僻雪晴往訪見艸屋低小松蘿翳然忽米桶中有人聲則徽之妻也詢其所之曰溪上捕魚耳詣之果然隔溪謂諸公曷先至舍待我乎少選携魚換酒而歸盡懽別去他日再往則業已遷居莫知其處

翁森字秀卿隱居教授取朱子白鹿洞學規以爲訓從遊者前後至八百餘人有一瓢稿行于世初陳剛中與森善及奉使西川乃悉屏騶從葛衣而造之森迎而笑曰斯吾昔日剛中乎促坐劇談而別時論兩高之

元吳淳字世英清介自持不樂仕進與周志吳得和原善輩設義塾延張廷玉爲之師以教其鄉之子弟自是儒風益振初里中惟陸種淳率衆開白馬堰引水

灌田至今受其惠云

論曰君子治則龍見亂則鴻冥宋元之際悲哉其爲世也士雖不沉淪自甘奚可得哉其才無所施而復隳守解節士何取焉易曰天地閉賢人隱此之謂也

厚德列傳

宋吳福天性純厚括有鉅賈留千金于其家久之不至福爲貿遷得贏及賈之子至悉以歸之賈曰向者吾父留千金贏則君自致吾敢覬乎互相遜決之縣縣上之郡使中分其息福仍不受乃以其半歸之僧廬時福尙無子賈之子感其義購得顏氏女納之遂生子奉奉樹德赴義綽有父風其孫允昭尤善施賑歲饑鄉人戲榜其門曰旦日大施遠近聞之扶攜就食允昭欣然曰此助吾爲善者也傾廩以賑全活甚多後子孫曰昌冠裳相禪鬱爲名族

吳渭生一歲而孤母葉氏矢志守貞以勤儉致富然樂于賑施貧乏渭體母心

建層樓可望十里雪中有不舉火者潛令人以粟遺之自括蒼至海涯悉造磚甃路以便往來客贈之詩云雪暗無人遺積粟月明有客步康衢值歲大饑散私錢二百萬發粟二千石所濟甚衆諸父康肅公詩曰吾家渭侄非常兒讀書事母成家肥此心但欲濟鄰里身外浮名非所希欲以致仕恩蔭與之力辭郡欲上其事又辭朱文公爲常平使者以名聞補其次子椿文學
張慧字彥智盛夏時有客憩于其門遺數十金而去其子拾其金以告彥智曰得非過客所遺乎汝藏之以俟其返已而客至遂還之
張標字廷英天性孝友有妹未嫁而卒標以二百金遺妹之夫或止之曰吾父與諸叔分田輒以膏腴讓之吾繼父志耳弟櫓遇虎危甚標奔而救之惟持一傘挺身奮擊幾爲所噬已而鄉人稍集虎逸而去

吳子龍少參廉之子也有友人欲爲子締婚于子龍蘊而不言已而友人死遂以女妻其子曰向者吾以心許之矣子龍以序當貢其次老而貧遂慨然讓之

後爲滁州訓導將之任寄三百金于族人比其反也族人匿其金子龍付之一笑其德量如此

論曰陸務觀云爲善自是士人常事今乃邀身後福報若市道吾實恥之今吳福等好施市義出于素性豈念及福與名哉夫天道無親常予善人厚人者所以自厚也書此以示勸焉

仙宗列傳

漢徐來勤字元和按本際經云昔在赤明劫一百八身爲道士濟生度死後白晝乘火上昇至東漢時爲太極法師隱括蒼洞詳見寶藏名山記

王遠字方平東海人舉孝廉歷官中散大夫明天文圖讖逆知盛衰吉凶桓帝召見不言但題數百字於宮扇其後皆驗留太尉陳耽家三十年忽自言當死既死而殮復失其所後至括蒼洞與蔡經會焉

吳左慈字元放葛玄之師也赤烏二年與玄游括蒼洞鍊九華丹股之得道

萬歷仙居縣志

卷十一

八

仙居叢書

葛玄字孝先洪之從祖遊括蒼洞遇左慈授以祕訣符籙戲幻之術赤烏七年尸解而去爲太極左仙公宋封冲應真人

晉平仲節河中人人括蒼山受業宋君存心鏡之道積四十五年後乘雲駕龍上昇

羊愔邑令忻之弟也以峽江尉罷歸隱括蒼山一日與道士飲忽仆而寢云有人自稱靈英邀入洞中須臾石間迸出一物曰此青靈芝也愔食之甚美自是覺身輕骨鳴時往省兄朝去暮還後入羽山莫知所終

宋王溫素好善能造夾紵像一日有二癩者踵門溫憐之謂有藥可愈乎癩者云得新酒浸其中卽愈耳溫家釀適熟遂聽之越宿癩者出則皆美少年也謝而去酒有異香溫與妻孥飲之其糟以食雞犬遂拔宅上昇時宋景德四年也縣之改名以此社壇卽其遺址

論曰秦皇漢武雄心猛鷲牢籠一世而思蛻跡羽化難矣哉俗儒輩緣此詆

爲幻妄則又何也夫以玉階金穴爲真其必以瓊池瑤島爲贗矣有能割榮剪嗜冥心外形其仙乎其仙乎

釋氏列傳

晉曇蘭青州人支姓日誦三十萬言嘗憩赤城有神長數丈屈膝自言願推室相奉世傳爲韋羗山神也

唐灌頂章安人吳姓字法

章安禪師聆智顛說法了無遺忘嘗入都講演晉

王遣使送之還山爲造國清寺今爲天台第五祖師武德中卓錫于安洲山

宋清徹戒行高潔天禧中嘗截一掌爲衆祈雨立應菴前猛虎馴伏及示寂鄉人塑像祀之

妙機陳姓母初娠夢神僧告之曰當生賢子及生有奇相落髮事雙林昌師後歸林下通判章憑因行縣謁之問如何是妙曰點鐵成金如何是機曰百發百中章尊事之又有行機者號蘭堂操行尤潔後居國清寺趺坐而化世稱大機

萬歷仙居縣志

卷十一

九

仙居叢書

小機云

國朝道固臨海人住護聖寺不出關二十五年壽八十以生死同日作偈趺坐而化

文瀚臨海人研究經旨永樂間應詔預校永樂大典後還陽峯與僧德貴講圓覺經至四大各離處恬然而逝

論曰自昌黎氏闢佛老世遂操戈法范以自飾其淺謬夫下者以聲色求道及墮頑空者固無取焉若夫安禪守律不壞佛門相而成出世法其悟入與吾儒所得孰深乎 英嘗謂吾學佛然後知儒旨哉斯言此未可與淺淺者道也

僑寓列傳

宋薛昂字啓明錢塘人歷官門下侍郎資政殿大學士建炎中避金人之難寓於萬竹山

韓昭字用晦真定人丞相績之曾孫官至直顯謨閣自號大同居士紹興初避地於安洲山焉

論曰詩有之瑣兮尾兮流離之子傷旅食也夫士生斯世至於輕去其鄉豈情也哉豈其中有深隱大痛不得不韜晦其迹以寄其有爲有待之軀而竟於功成名遂聲施後世者此未可於常人中求之也攷流寓於仙居得薛昂韓昭二人焉